

## ■ TRIBUNA POLITICA

## La parola olimpica

DA SILVA SEMADENI,  
CUSSEGLIERA NAZIUNALA

Gieus olimpics èn facti-  
bels, duraivels, finan-  
zialmain supportabels ed  
ina schanza unica.» Uschia  
la resumaziun da la propa-  
ganda che passa dapi mais  
sco ina splattitscha tras il  
Grischun. Schizunt la  
«Neue Zürcher Zeitung»  
discurra d'ina parola d'en-  
viern che vegn servida a la  
populaziun grischuna. E la  
«Weltwoche», segir betg il  
portavusch dal moviment  
ecologic u da la Partida so-  
cialdemocratica, demascre-  
scha ils plaids dals promo-  
turs sco trics da marketing  
per gudagnar la votaziun.  
Las gasettas grischunas de-  
rasan e sustegnan a medem  
temp supplements nuncritics  
plain laudavaglias.

Ils promoturs da San Mu-  
rezzan 2022 (quai è il  
vair num dals gieus e betg  
Grischun 2022!) sfarlatan  
milliuns per lur propaganda  
dals bels plets, importe-  
schan promis da l'entira  
Svizra per far squitsch e cus-  
seglier federal *Ueli Maurer*  
ha participà ad almain 12  
occurrentzas en Grischun  
per far empermischuns ch'el  
na sa betg garantir. Il cum-  
bat da votaziun en Gri-  
schun è sco il combat da  
David encunter Goliat. Da  
nossa vart ina grupp da vo-  
luntaris cun in budget da  
var 80 000 francs, da l'autra  
vart ina maschinaria cun  
employads e biros da propa-  
ganda e cun chasas edituras  
che sustegnan la campagna  
dals promoturs cun la pa-  
lutta gronda.



Mo tge signifitga San  
Murrezzan 2022 pro-  
pi? Duvrain nus quest me-  
ga-event per il salvament da  
noss turissem che è en la  
crisa? Spassegian bainbaud  
millis e millis da Chinois  
sin la promenada da Tavau  
u sa diverteschon en avegnir  
numerus Giapunais sin las  
pistas en l'Engiadin'Ota?  
Era la «NZZ» è sceptica e  
scriva ch'ils giasts da l'Asia  
rivian en Europa sco turists  
dal «Sightseeing». A Lille-  
hammer vesan ins numna-  
damain nagins Giapunais  
che van culs skis, malgrà ils  
gieus olimpics alvs il 1994.  
I na dat nagin studi scienti-  
fic che cumprova che gieus  
olimpics portian suenter  
l'occurrentza in augment dal  
turissem u procurian per in  
meglier image. Schizunt ils  
experts dals promoturs da  
San Murrezzan 2022 ston  
admetter che l'effect a lunga  
vista è betg calculabel. E dal  
reminet: Na fuss i forza  
tuttina betg pli prudent da  
promover il turissem da  
l'entir chantun che da su-  
stegnair mo quella marca  
grischuna «Top of the  
World» e quai anc cun in  
turissem da massa betg gia-  
vischè?

Ils gieus olimpics San  
Murrezzan 2022 custas-  
san passa quatter milliar-  
das francs. Il cussegl fede-  
ral ha empermess ina mil-  
liarda (la decisiun definiti-  
va è dentant en la cumpe-  
tenza dal parlament), il  
Grischun duai metter a  
disposiziun 300 milliuns  
da sias reservas surtut per  
garantir la segirtad dals  
gieus. Tgi che surpiglia il  
deficit prevesibel n'è anc  
betg cler. En il parlament  
federal existan dentant  
grondas resalvas, la cumis-  
siun da finanzas escluda  
unanimamain da surpi-  
gliar ina garanzia da defi-  
cit, ella pretenda explicita-  
main ch'il chantun Gri-  
schun surpigliass quel.

En gnanca sis onns ve-  
gnissan pia reservas da  
lavor construidas che ser-  
vissan normalmain forsa  
per duas u trais giadas  
quest temp. Las schanzas  
che la mastergnanza indi-  
gena rivia da dumagnar la  
concurrentza internaziunala  
èn pitschnas, la schanza da  
stuar sa cuntentar cun las  
miclas è pli gronda. E tge  
capita suenter ils 2022?  
Restan anc raps per realisar  
projects en las autras re-  
giuns en il Grischun? U  
stuan nus anc pajar forsa  
durant decennis ils debits  
dals gieus olimpics sco che  
quai è succedi ad Albertvil-  
le, Lillehammer, Nagano,  
Salt Lake City, Torino u  
Vancouver? Jau vulesch che  
gieus olimpics restassan  
mo ina parola d'enviern  
cun ina buna fin. In na ils  
3 da mars garanteschon  
quai.